

新元史

列傳

第十九至第二十五

第參拾肆册

列傳第十九

新元史卷之一百二十二

賜進士出身日講起居注官翰林院侍讀國史館纂修膠州柯劭忞撰

速不台

兀良合台

阿朮

也速解兒

速不台兀良合氏兀良合為塔立斤八族之一蒙古俗

聞雷匿不敢出兀良合人聞雷則大呼與雷聲相應故

人尤驍悍速不台遠祖捏里必獵於斡難河上遇敦必

乃汗因相結為按答捏里必生孛忽都眾目為折里麻

譯語有知略人也孛忽都孫合赤溫生哈班哈不里哈

班二子長忽魯渾次速不台俱善騎射太祖在巴勒渚

納哈班驅羣羊以獻遇盜被執忽魯渾兄弟繼至以槍

刺一人殺之餘黨逸去遂免父難忽魯渾以百戶從太祖與乃蠻戰於闊亦田之野遇大風雪忽魯渾乘風射之敵敗走速不台以質子事太祖亦爲百戶太祖卽位擢千戶七年從太祖伐金攻桓州先登拔其城賜金帛一車十一年太祖以蔑兒乞乘我伐金收合餘燼會諸將於和林問誰能爲我征蔑兒乞者速不台請行太祖壯而許之山路險峻命裹鐵於車輪以防摧壞速不台選裨將阿里出領百人先行覘蔑兒乞之虛實戒之曰汝止宿必載嬰兒具以行去則遺之使若挈家而逃者蔑兒乞見之果以爲逃人不設備十三年速不台進至

吹河大破之盡殲其眾十四年太祖親征西域命速不
台與者別各率萬人追西域主阿剌哀丁戒以遇彼軍
多則不與戰而俟後軍彼逃則亟追勿舍所過城堡降
者勿殺掠不降則攻下之取其民爲奴不易攻則捨去
毋頓兵堅城下時西域主棄撒馬爾罕遠遁速不台者
別渡阿母河分路追之西域主逃入裏海島中未幾病
死盡獲其珍寶以獻事具西域傳太祖曰速不台枕戈
血戰爲我家宣勞朕甚嘉之賜以大珠銀甕速不台與
者別遂入其西北諸部諸酋皆望風納款西域軍事略
定十六年太祖命速不台與者別進討奇卜察克循裏

海之西入高喀斯山大破奇卜察克之眾殺其部酋之弟玉兒格其子塔阿兒匿於林中爲奴所告執而殺之速不台縱奴爲民還以聞太祖曰奴不忠於主肯忠事他人並戮之奇卜察克酋遁入斡羅斯境速不台者別引兵至喀勒吉河與斡羅斯戰於孩兒桑之地斬獲無算速不台奏以蔑兒乞乃蠻怯烈康鄰奇卜察克諸部千戶通立一軍從之初太祖命速不台者別以三年爲期由奇卜察克返至蒙古地與太祖相見至是一將凱旋遵太祖之命而返十九年太祖親征西夏以速不台比年在外恐其父母思之遣歸省速不台奏願從西征

太祖命度大磧以往二十一年破撒里畏兀特勒赤閔等部及德順鎮戎蘭會洮河諸州得牝馬五千匹悉獻於朝二十二年聞太祖崩乃還太宗卽位尙禿滅干公主從太宗伐金圍慶陽我軍及金人戰於大昌原敗績命速不台援之二年速不台與金將完顏彝戰於倒回谷又失利爲太宗所責睿宗曰兵家勝負不常宜令速不台立功自效遂命引兵從睿宗南伐三年冬出牛頭關遇金將合達率步騎十五萬赴援睿宗問以方略速不台曰城居之人不耐勞苦數挑戰以勞之乃可勝也睿宗從之明年正月大敗金人於三峰山合達走鈞州

追獲之合達問速不台安在願識其人速不台出曰汝須臾人耳識我何爲合達曰人臣各爲其主我聞卿勇蓋諸將故欲見之其爲敵國畏服如此三月從太宗至汴金人議守汴之策舍裏城而守外城外城周世宗所築堅不可攻速不台以步騎四萬圍之又徵沿河州縣兵四萬募新兵二萬共十萬人分屯百二十里之內大治攻具驅降人負薪填塹設强弩百張攻城四隅仍編竹絡盛石投之未幾積石高與城等守者亦仿製竹絡盛所投之石還擊之復以鐵罐盛火藥擲於下爆發聲聞數十里名曰震天雷迸裂百步外我軍冒牛皮至城

下穴隧道城人縛震天雷於鐵絙絕擊之又製噴火筒
箭激射十餘步我軍惟畏此二器攻十有六日城不下
乃許金人和納其質曹王訛可四月車駕北還留速不
台統所部兵鎮河南速不台謬爲好語曰兩國已講好
尙相攻耶金人就應之出酒炙犒師且賂以金幣乃退
駐汝州託言避暑掠其糧餽俟饑疲自潰已而金飛虎
衛士殺使臣唐慶等三十餘人和議中敗速不台復帥
師圍汴金主棄汴北走明年正月追敗之於黃龍岡金
主南走歸德未幾又走蔡州金崔立以汴降速不台殺
金荆益二王及宗室近屬俘其后妃寶器獻於行在七

年太宗以奇卜察克斡羅斯諸部未定命諸王拔都討之而以速不台爲副八年速不台首入布而嘎爾部太祖時其部降而復叛至是悉平之九年入奇卜察克奇卜察克別部酋八赤蠻數抗命太宗遣速不台出師卽日聞八赤蠻有膽勇速不台可以當之至是八赤蠻聞速不台至大懼遁入裏海速不台俘其妻子以獻十年復從拔都入斡羅斯悉取斡羅斯南北諸部事具拔都傳當拔都攻斡羅斯之屬國馬札兒部速不台與諸王五道分進馬札兒酋貝拉軍勢盛拔都退渡鄯甯河與貝拉夾水相持上游水淺易涉復有橋下游水深速不

台欲結棧潛渡繞出敵後諸王先濟拔都軍爭橋反爲敵乘沒甲士三十人并麾下將八哈秃旣濟諸王又以敵眾欲要速不台返速不台曰王自返我不至杜惱河馬札刺城不返也乃進至馬札刺城諸王繼至遂攻拔之拔都與諸王言曰灑甯河之戰速不台救遲殺我八哈秃速不台曰諸王惟知上游水淺且有橋遂渡而與戰不知我於下游結棧未成今但言我遲當思其故於是拔都亦悟後大會飲以馬乳及蒲桃酒言征貝拉時事推功於速不台拔都與諸王飲酒先酌諸王怒拔都馳奏其事時定宗先歸太宗切責之謂諸王得有幹羅

新元史卷一百二十二 死傳 五
斯部眾實速不台之力云太宗崩諸王會於也只里河
拔都欲不往速不台曰大王於族屬爲兄安得不往拔
都卒不從其言定宗卽位速不台俟朝會畢遂請老家
於禿剌河上定宗三年卒年七十有三至大三年贈劾
忠宣力佐命功臣開府儀同三司上柱國追封河南王
諡忠武子兀良合台

兀良合台太祖時以功臣子命監護皇孫蒙哥後掌憲
宗潛邸宿衛太宗五年從定宗擒布希萬奴於遼東又
從諸王征奇卜察克斡羅斯孛烈兒諸部定宗元年又
從拔都討孛烈兒乃捏迷思部平之定宗崩拔都與諸

王大將會於阿勒塔克之地定議立憲宗定宗皇后遣使告拔都宜更議兀良合台對曰議已定不能復變拔都曰兀良合台言是也憲宗遂卽大位憲宗二年命世祖討西南夷諸部以兀良合台總軍事三年世祖師次塔拉分三道而進兀良合台由西道踰宴當嶺入雲南境分兵攻白蠻察罕章諸寨皆下之至阿塔刺所居半空和寨倚山帶江地勢峻險兀良合台立礮攻之阿塔刺自將來拒兀良合台遣其子阿朮逆擊之阿塔刺敗遁并其弟阿叔城俱拔之是年十二月世祖入大理都城國王段興智迎降獲大理將高祥於姚州留兀良合

台攻諸蠻之未下者遂班師四年兀良合台攻烏蠻次
羅部府敗蠻酋高華進至赤押城城三面瀕滇池兀良
合台以礮攻其北門又縱火焚之皆不克乃鳴鉦鼓震
之使不知所爲凡七日伺其惰阿朮乘堙而入遂克之
餘眾依阻山谷命諸將掩捕之圍合阿朮引善射者三
百騎四面蹙之兀良合台先登陷陣盡殲其眾又攻拔
織寨至乾德格城環城立礮以草填其塹而渡阿朮率
所部搏戰城上克之五年攻不花合因阿合阿因諸城
又攻赤秃哥寨及魯魯斯國塔渾城忽蘭城皆克之魯
魯斯國請降阿伯國有勝兵四萬負固不下阿朮突其

城而入乃舉國請降又攻拔阿魯山寨及阿魯城遇赤
禿哥軍於合打山大敗之殺獲幾盡凡平大理五城
八府四郡及烏白蠻三十七部六年征白蠻波麗部其
酋細蹉甫降與段興智同時入覲雲南平詔以便宜取
道與鐵哥帶兒兵合遂自烏蒙趨瀘江破禿刺蠻三城
擊敗宋兵奪其船二百艘於馬湖江通道於嘉定重慶
抵合州七年獻夷捷於朝請依漢故事以西南夷爲郡
縣從之賜其軍銀五千兩彩幣二萬四千匹授銀印進
都元帥還鎮大理秋九月遣使招降交趾不報遂伐之
其國主陳日昷隔洮江列象騎以拒兀良合台分兵爲

三隊濟江部將徹徹都從下游先濟兀良合台居中駙
馬懷都與阿朮殿後仍授徹徹都方略曰汝旣濟勿與
之戰蠻必逆我俟其濟江我使懷都邀之汝奪其船蠻
敗而反走無船以濟必爲我擒徹徹都違命登岸卽縱
兵擊之日昃雖大敗得乘舟逸去兀良合台怒曰先鋒
違我節制國有常刑徹徹都懼飲藥死兀良合台入交
趾日昃遁海島得前所遣使者於獄以破竹鉗其體入
膚一使死焉兀良合台怒屠城人以報之越七日日昃
請內附乃大饗將士而還是年憲宗大舉伐宋八年侵
宋播州士卒遇炎瘴多病兀良合台亦病遂失利詔兀

良合台還軍趨長沙兀良合台率騎三千蠻焚萬人拔
橫山寨入老蒼關徇宋內地宋將以兵六萬來拒遣阿
朮自間道襲敗之自貴州入靜江府連克辰沅二州直
抵潭州宋將向士壁固守不下世祖遣鐵邁赤迎兀良
合台於岳州乃解圍引軍而北作浮橋於鄂州之新生
州以濟師宋將夏貴率舟師斷我浮橋進至白鹿磯又
獲我殿兵七百人兀良合台力戰始渡江與世祖軍合
世祖中統元年夏四月兀良合台至上都至元九年卒
年七十二追封河南王諡武毅子阿朮初兀良合台事
憲宗於潛邸及拔都議立憲宗兀良合台實助之世祖

新元史卷一百二十二 列傳 兀良合台
卽位憲宗諸子從阿里不哥於和林兀良合台爲憲宗
舊臣世祖疑而忌之故討阿里不哥兀良合台以宿將
獨擯而不用焉

阿朮有智略臨陣勇決從兀良合台征西南夷率精兵
爲候騎所向有功平大理烏白等蠻及伐安南阿朮出
奇制勝尤爲諸將推服兀良合台駐軍押赤城奉命會
師於鄂州瀕行阿朮戰馬五十匹爲禿刺蠻所掠偵之
有三蠻寨匿馬山顛阿朮率健士攀厓而上生獲蠻酋
盡得前後所盜馬一千七百匹乃屠押赤城而去憲宗
勞之曰阿朮未有名位挺身許國特賜黃金三百兩以